

Carta abierto na e comunidad Latino residente na Aruba y na e politiconan na Aruba

E derecho di voto ta igual pa tur ciudadano di Aruba cu tin Paspoot Hulandes

Mi a tuma nota cu un grupo di personanan procedente di e comunidad Latino-americano na Aruba, encabeza pa senora Marialis Tejada, di e organizacion "Amigos de Colombia", a organiza un reunion politico Diadomingo atardi na Renaissance Convention Center, na unda nan a invita tur partido politico na Aruba y e comunidad Latino-americano residencia na Aruba pa asina haya informacion di e politiconan encuan to nan plan y puntonan di nan prog. ma politico pa loque ta trata e proximo Eleccion pa Parlamento di dia 25 de september 2009.

Riba su mes mi ta aplaudi cu un grupo minoritario den nos comunidad ta haci uso di nan derecho di expresion pa vocifera nan pensamentonan y comunica e pensamentonan aki na e politiconan invita. Artículo 25 di e Convencion pa Derechonan Politico y Civil ta subraya e coneccion cu tin entre e derecho di voto y e derecho di expresion. Mi no por tin ningun objecion en contra di un evento politico informativo asina.

Den su rueda di prensa ariba diabierna ultimo, e grupo di Latino-americano encabeza pa senora Marialis Tejada, a laga sa cu como cu e Latino-americano residencia na Aruba ta consisti di aproximadamente 39.000 persona, cual ta encera un tercera parte e comunidad di Aruba di cual 9.000 persona tin un paspoort Hulandes, nan kier laga nan voz resona y tende di e politiconan cual te e plannan cu nan tin pa acomoda e segmento importante aki den e comunidad di Aruba.

E meta principal di e evento aki, segun senora Marialis Tejada, ta pa haya sa di e politiconan cual ta e beneficiaran particular pa e comunidad Latino-americano residencia na Aruba pa loque ta trata e "Landsverordening Toelating en Uitzetting", esta LTU y e integracion di e grupo Latino-americano na Aruba.

Den otro palabra, un segmento chiquito den e comunidad di Aruba ta exige maximalisacion di nan voto pa e proximo eleccion, door di laga e politiconan priminti nan extra beneficiaran ariba e comunidad di Aruba en total. Como Abogada pa Derechonan Humano y Democratisacion, mi ta desaproba e implicacion di e grupo aki categoricamente. Door di kier tende di e politiconan kico nan ta bay ofrece e Latino-americano residencia na Aruba, e grupo aki, encabeza door de senora

Marialis Tejada ta implica cu e segmento chiquito di Latino-americano residencia na Aruba tin mas derecho cu e Arubiano, door di trece exigencianan particular pa asina maximalisa nan voto den e proximo eleccion y di e forma aki influencia e resultado di e eleccion di dia 25 di september 2009. E implicacion di e grupo aki ta cu e voto di e Latino-americano residencia na Aruba tin mas valor cu e voto di e dos tercera parti di comunidad Arubano. E actuacion di e grupo aki, encabeza pa senora Marialis Tejada ta enpugna cu nos Constitucion y enpugna cu leynan y principionan internacional di democracia, na unda e derecho di voto no mag ta mara na beneficiaran particular di un solo segmento den e comunidad, pero e eleccion mester ta habri y liber y e mester ta na beneficio di e comunidad en general y no na e beneficio di un grupito particular.

E actuacion di e grupo di Latino-americano, encabeza pa senora Marialis Tejada, ta na mi parecer hasta castigabel, pasobra e grupo chiquito aki den nos comunidad ta purbando di eherce un influencia ariba politiconan na Aruba pa asina maximalisa nan voto den e proximo eleccion pa Parlamento di Aruba en contra di e deseonan y beneficiaran di e comunidad Arubiano den su totalidad.

Aruba tin un Democracia Parlamentario: Aruba tin un democracia parlamentario, locual ta implica cu tur personan cu tin derecho di voto por haci esaki libremente pa e partido di su preferencia. Na momento cu un partido haya e mayoria di votonan e por cumenza deliberacionan pa forma un gobierno, esta su Cabinet y e partido ta asigna e miembronan di parlamento cu ta bay representa e pueblo en general. Un miembro di Parlamento den ehecion di su profesion como parlamentario no mag di favorece un segmento chiquito den comunidad en contra di e deseo di e mayoria di e poblacion di Aruba. Un democracia parlamentario no ta funciona mescos cu un democracia presidencial, manera tin na Merca, na unda e president tin cu tene cuenta cu e deseonan particular di e gruponan minoritario, pa asina e no perde e votonan di e segmento chiquito aki den su comunidad. Na mundo ta existi diferente tipo di democracia. Aruba conoce un democracia parlamentario y te asina leeuw



el a funciona pa añanan.

Na paisnan Latino-americano nan conoce otro tipo di democracia, esta un democracia presidencial. Hopi biaha ta trata di paisnan menos desaroya y e pueblo hopi biaha ta den gran necesidad y consecuentemente e tin cu maximalisa su voto door di exige cierto beneficiaran particular pa haci esaki.

Na Aruba nos tambe a conoce e tipo di influenciacion aki den pasado, na unda un ciudadano ta vota pa un partido na unda e por maximalisa su voto; esta e partido cu kier paga mas pa su voto. Cu pago mi no kiermeen solamente placa en efectivo, pero tambe beneficiaran particular, manera un trabao den gobierno etc. Un eleccion asina no ta liber, pasobra e politico cu tin mas placa semper lo sali na ventaha compara cu e politico cu no tin mesun fonsa financiero.

Den su "Rapport Calidad" di algun aña pasa, senor Dr. Mito Croes, a subraya cu esaki ta sosode den comunidnan chiquito, pero cu esaki ta contra-productivo, pasobra e persona no ta vota pa e bienestar general, pero pa su bienestar particular.

Status Aparte a worde logra cu lagrima, sudor y sanger:

Status-Aparte di Aruba a worde logra cu lagrima, sudor y sanger. E ciudadanonan di Aruba a hiba un lucha tenaz pa mas cu 60 aña pa logra haya su Status-Aparte y asina obtene tur e beneficiaran cu nos tin awe. Gran lidernan politiconan, manera defunto Henny Eman q.e.p.d., defunto senor Shon A Eman q.e.p.d. y defunto senor Betico Croes q.e.p.d. a bringa un lucha pisa cu awe nos tin nos Status-Aparte y un bon porvenir. Tras di cada nomber di e gran lidernan aki tin para q.e.p.d., esey ta implica cu tur di nan a lucha incansablemente pa logra e meta di Status-Aparte y e lucha aki a hiba nan na un morto prematuro. Aruba a haya su Status Aparte no regala, sino despues di hopi lucha cu sanger, sudor y lagrima, pa nos awe tin un mihor futuro.

E beneficiaran di e ciudadano "nobo": Door di e mehor futuro cu nos Status Aparte a brinda nos desde 1986, nos por a invita hopi ciudadanonan di varios paisnan Latino-americano na nos pais Aruba, pa nan tambe por bin gosa di un bon futuro. Hopi di e ciudadanonan "nobo" aki ta

procedente di paisnan hopi pover y nos Arubianonan a habri man pa nan, pa asina nan tambe por tin un mehor futuro, mescos cu nos, Arubianonan. Asina e ciudadanonan "nobo" aki por haci uso di un bon seguro medico, esta AZV y mi por bisa door di propio experiencia cu e ciudadano "nobo" aki ta maximalisa su derecho di seguro medico te na unda no por mas.

Mayoria di e ciudadanonan "nobo" aki ta traha trabaonan sin tin mester di diploma, locual ta paga un salario minimo, esta un salario hopi abao. Consecuentemente su contribucion na AZV ta un fraccion di e costonan real di su gastonan medico. Pasobra nos tur ta igual den nos Constitucion, e ciudadano "nobo" aki tambe haya e mesun trato cu un Arubiano cu ta gana por ehempel Awg. 100.000,00 pa aña y cu tin cu paga 7,5% di su entrada locual ta Awg. 7.500,00 na premie pa AZV pa aña, mientras cu mayoria di e ciudadanonan "nobo" aki ta gana e minimumloon, locual ta aproximadamente Awg. 1.500,00 pa luna, cual ta ensersa cu e ciudadano "nobo" aki ta paga Awg. 1.350,00 pa aña na AZV.

E yiunan di e ciudadanonan "nobo" aki ta gosa di un bon educacion primaria, secundaria y universitaria. E yiunan di e ciudadanonan "nobo" aki, por bay sigui studia den exterior y nan por bira docter, abogado y nan por kies pa otro profesionan, tur paga pa e pueblo di Aruba, pasobra den nos Constitucion tur ciudadno ta igual. E ciudadanonan "nobo" tambe por haci bon uso di nos sistema di educacion y pa educacion pa empleo.

Na otro banda, hopi di e ciudadanonan "nobo" aki ta haya paspoort Hulandes, pero ta keda cu e paspoort di su pais natal. Un paspoort ta un documento hopi importante. Akinan tambe tin un discrepancia grandi si Bo compara e Arubiano cu e persona di Latino-America. E persona cu por tin dos paspoort por haci uso di dos paspoort tambe, asina hayando tur e beneficiaran di tin dos paspoort.

Aruba ta un pais sumamente generoso y nos Arubianonan ta hendenan hopi amabel, hospitalario y generoso y nos a demonstra esey tambe. Locual si mester worde bisa di e Arubiano keto, suave y humilde ta, cu e no ta tolera ora cu un grupito cu ta bin di afor, kier sobrepasa su limitenan di hospitalidad y generosidad y ta akinan na mi parecer, e grupo di Latino-americano, bao guia di senora Marialis Tejada, a sobrepasa. Ningun Arubiano lo acepta cu un segmento chiquito den nos comunidad kier secuestra e proximo eleccion pa Parlamento di Aruba ariba dia 25 di september 2009 y nos lo para fuerte contra esaki.

Algo personal. Un biaha mi a yega di bisa un docente

Hulandes cu a sobrepasa nos hospitalidad y generosidad: "No tuma e humildad di e Arubiano pa bobedad, pasobra e Arubiano por wel di ta keto, pero e sa masha bon mes kico ta pasando rond di dje y cune." Esaki mi ta ripiti na e grupo di Latino-americano, bao guia di señora Marialis Tejada.

Un sugerencia ta bay na e grupo di Latino-Américano, bao liderazgo di senora Marialis Tejada, cu si Bosonan kier integra di berdad na Aruba; si Bosonan kier respeta nos Arubianonan di berdad, cumenza na papia e lengua materna di Aruba, esta nos dushi Papiamentu y acepta nos reglanan y valornan, ta e ora Bo ta demostra cu Bo ta un Bon Arubiano "nobo" y ningun hende lo bisa Bo nada, pasobra Arubianonan ta hendenan generoso y hospitalario. Locual si mi kier alerta e grupo, bao guia di senora Marialis Tejada, ta cu si Bosonan sigui insisti cu e segmento di Latino-americano biba na Aruba, tin mas derecho cu nos Arubianonan, e ora ey si nos Arubianonan lo bay tin problema grandi cu esaki.

Observadornan di OSCE pa Eleccion na Aruba: Na e politiconan na Aruba cu ta kere di por saca ventaha door di laga un segmento chiquito den nos comunidad, cu no a biba e lucha di nos Arubianonan pa haya su Status Aparte, esta cu lagrima, sudor y sanger, mi kier bisa Bo, cu ami lo vigila Bo actitud di cerca y lo mi actua conforme e reglanan Europeo pa un "Observador di Eleccion". Un Observador di Eleccion no solamente ta vigila e proceso di eleccion ariba e dia di eleccion so, pero ta vigila tambe e actuacion di e politiconan varios luna promer cu e eleccion. Si den mi concepto mi ta haya cu e proceso di eleccion no ta bay habri y limpi, lo mi no vacila pa pidi e Organizacion pa Seguridad Europeo pa nan manda Observadornan di Eleccion pa e proximo eleccion pa Parlamento na Aruba dia 25 di september 2009.

Di curason mi ta desea cu esaki lo no ta necesario y cu e politiconan den nan afan di haya mas voto ta actua manera nos Constitucion ta dicta. Na e grupo di Latino-americano, bao liderazgo di senora Marialis Tejada, mi ta expresa pa Bosonan hiba bon nota di locual mi a trece padilanti, pasobra ami ta un di e luchadornan incansabel pa nos Status Aparte, pero mi tin tambe e poder cu mi diploma pa Master's Degree den Derechonan Humano y Democratisacion ta dunami, di por actua na tur parti di mundo na unda e Derechonan Humano ta worde viola, den e caso aki ta e derechonan humano di e Arubianonan pa participa den un eleccion na unda tur votador ta igual ta na wega.

Edwina Henriquez,
Abogada Internacional
pa Derechonan Humano
y Democratizacion.